

Tante Liesbeth wull eis maol allein dör Dresden

Dei Frauenkarken har ehr dat andaon -Bi dei Semperoper steek ehr dei Hühnerzoppen inne Näsen

Ollenborger Münsterland – Du kanns henhörn, wor du wullt. Aal Lüe sünd an't Stöhnen.

Endlick bold Urlaub! At Tante Liesbeth jung wör, do dachde nich ein' an Urlaub, un vandaoge mott dat „Malle“ wän. Kanaren off Karibik wör uck nich schlecht..

Ne, in't Utland wull Tante Liesbeth mit ehre 74 Jahr nich mehr. In Dresden wör sei malläwe noch nich wän. Mit'n groten Bus schull 't los gaohn. Ehre Nichte fäuerde mit. Wäken vörher har sei all nicks änners mehr in'n Koppe.

För dei Frauenkarken har sei jao uck noch Geld gäwen. Drei Daoge harn sei ein strammet Programm. An 'n lessten Dag kunn'n aal daun un laoten, wat sei wull'n.

Dei Nichte güng shoppen, un Tante Liesbeth wull noch einmaol wedder in dei Frauenkarken. Dor wull sei ehre Seele baumeln laoten. Dat dö ehr uck richtig gaut. Einmaol allein dör Dresden! Wat was dat schön! Ach jao, an ehrn Klübken möss sei uck noch 'ne Kaorte schicken.

Ümme Ecke bi dei Semperoper steek ehr dei Rääke vanne Hühnerzoppen inne Näsen. Dor har sei jüst Schmach up. 4.50 Euro schöw sei äöwer den Thresen un settde den Teller mit dei Zoppen up 'n Stehdisk. Ehre Handtaschken hüng sei an 'n Haoken dorünner. Nu haolde sei noch schlacke den Läpel. At sei trügge köm, stünd dor ein Utlänner. Dei leet naon Afrikaoner. Un dei lööt sick dei Zoppen schmecken. „Wat fällt denn in, typisch Utlänner! Dat will ick üm wiesen!“ Sei stelde sick näben üm, un beide läpelten dei Zoppen van 'n Teller. Kienein sä wat. Aff un tau keeken sei sick an.: Liesbeth bäten duller at dei Utlänner. Man sehg üm dat an. Dei Zoppen schmück üm.

Un do haolde hei, dei Afrikaoner, uck noch zwei Tassen Kaffee. Dei ein' Tassen schöw hei nao Tante Liesbeth. „Oh“, denkt sei, „hei häff sick bekrägen. Bittken Anstand sitt d'r doch noch in“. Aower so ganz köm sei dor nich äöwer weg: „Einfach miene Hühnerzoppen äten!“ At Liesbeth den lessten Läpel Zoppen daolschlök, do har dei Afrikaoner all „Tschüüß“ säggt un was hendaol gaohn. „Oh, oh“, dachde Liesbeth un langde nao ehre Handtaschken ünnern Disk. Wäge! „Dat har ick mi denken kunnt! Utlänner! Mit 'ne Tassen Kaffee afflenken!“ Sei wör ganz verdaddert, sei wör ut'n Hüüsken. Sei mök 'n Upstand.

Un do, up maol sehg sei ehre Taschken. Dat Blaut schöt ehr in'n Kopp. Dei hüng ünnern Näbendisk, und up'n Disk stünd ein Teller Hühnerzoppen. Dor wör noch nich ein bi wän.